

左恪靖侯奏稿初編

恪靖奏稿初編卷二十三目錄

奏報追剿竄賊獲勝連克浦雲和三城摺

收復詔安首逆乞降截剿逸賊疊勝情形摺

附陳攻克南靖縣城詳細情形片

奏報全閩肅清現飭越境追剿摺

請將剿賊大勝殲除要逆之康道等獎卹片

附陳侍逆業已伏誅片

請調援閩得力之軍回蘇聽候調派摺

陳明調派水師沿海巡緝片

奏報攻毀匪巢餘逆淨盡摺

附陳下府民俗并辦土匪情形片

清釐閩營欠餉停募兵缺摺

奏報追剿賊獲勝連克浦雲和三城摺

奏爲官軍追剿賊大獲勝仗連克平和漳浦雲霄各城恭摺馳

奏仰祈

聖鑒事竊官軍將漳州南靖兩城攻克後逆賊踉蹌西
鼠王德榜率軍由南靖追剿四月二十三日辰刻追至
羊城獲一大捷羣賊竄向林浦官軍追及又敗之共殺
賊五千餘名遂一向平和一向漳浦而遁高連陞黃少
春劉清亮各率所部向平和追剿二十四日馳抵小溪

偵知兩路之賊均竄平和二十五日卽各挑健勇馬隊
先行令大隊繼進疾馳三十里至馬鞍山望見賊之尾
隊高連陞等麾軍急擊賊敗走官軍乘勝追至五鳳山
下該逆尙欲拚死回拒官軍一擁向前喊殺之聲震動
山谷逆賊喪膽狂竄沿途殺斃及自相踐踏死者不下
七八千人二十六日高連陞等復分三路進剿越過兩
山見前面十餘里一片賊旗蜂擁而來官軍奮威迎擊
該逆屢挫之餘不敢戀戰紛紛奪路竄走官軍疾追五
六里斃賊千餘名正追殺間忽大雨如注始收隊還據

生獲賊供侍逆由漳州南靖敗竄其先踞小溪漳浦詔
安各股逆黨俱至平和會合意圖覓路他竄賊數愈增
二十七日高連陞率所部及副將林珠饒平勇由中路
黃少春率所部及總兵劉端冕前營由左右兩路劉清
亮率各營從後策應高連陞先飭副湘四營冒雨逕攻
磁洋賊壘環攻逾時該逆死拒不退黃少春率中營馳
至與高連陞洋鎗隊奮前猛撲拔開花椿木城躍濠而
入該逆急棄壘逃竄高連陞黃少春飭各營四面圍殺
兩壘之賊無一漏網遂乘勝直搗楚磯安下賊巢立破

堅壘十餘座侍逆及僞利王朱逆僞楊王李逆共挑死
黨數萬來援高連陞黃少春劉清亮各飭所部分路猛
撲往來衝擊三十餘次賊仍拚命相持高連陞等各率
親兵急從山頂繞出賊後擊之賊陣始動官軍乘勢縱
擊銳不可當賊大奔潰侍逆痛哭勒諸賊回堵連斫數
賊官軍已層層逼壓而前賊之敗逸者不能止也追至
城邊侍逆又驅諸賊轉闕城逆亦開礮助勢官軍轉戰
而前無不以一當十侍逆倉皇無措繞城而走城逆亦
急開西門狂竄高連陞等率各營衝殺入城斃賊數千

其中北門逃竄者被官軍蹣跚追及適因小港紛歧嶺路險仄賊眾擁塞自相踐踏及墮巖落水死者不計其數侍逆亦連馬墜於橋下身受重創各營蹣跚追二十餘里直至廣東大埔所轄赤石地方始行收隊署平和營遊擊順奎平和縣知縣曾近三亦率團助剿隨同將縣城收復計是役共殺賊萬餘名生擒三千餘名內賊目偽官甚多奔騾馬二千餘匹旗幟鎗礮無數此各軍追剿竄賊大獲勝仗攻克平和縣城之實在情形也其郭松林楊鼎勳兩軍攻克漳浦後卽飭提督黃中元總兵

高占彪馳回海澄率所部三營進紮長橋郭松林等亦由木棉港九龍嶺馳赴長橋與黃中元合紮二十三日親率各營至近城之博孝嶺一帶察看地勢見該處紮有賊卡一座守賊約千餘人當飭各營併力破之餘逆奔退入城官軍追至水磨嶺城北突出悍賊數千郭松林楊鼎勳飭各營據山列陣待賊撲近洋鎗排擊賊眾紛潰二十四日正飭各營過博孝嶺之南坑尾坑扼紮城賊又出大股來犯郭松林率各營由大路楊鼎勳率各營由小路前後夾擊斃賊甚多二十五日郭松林等

直抵漳浦城外週視東西北三門各築賊壘二座南門街口築賊壘一座當以賊眾附城築壘必先將外壘掃平始可直逼城下郭松林飭所部提督易用剛總兵李長樂朱德鴻曹仁美謝連陞副將洪寶林王德駿郭文武攻城之東北楊鼎勳飭黃中元及副將朱興榮張遵道總兵黃萬釗舒義志周河清高占彪攻城之西南城賊分門出拒郭松林等屢各營併力奮擊曹仁美張遵道從東西兩面首先接仗鏖戰逾時賊勢不支各營一擁齊上擒斬多名餘眾皆潰南北兩門外敗賊亦同時

縮入城內閉門死拒官軍遂乘勢將城外各賊壘一律掃蕩卽就東西北三門分布密紮二十六日郭松林楊鼎勳將援賊擊敗轟攻竟日羣逆驚駭異常至三更時由南門奪路竄走郭松林楊鼎勳督隊分門殺入當於二十七日丑刻將漳浦縣城攻克其雲霄踞逆知漳浦克復其勢已孤已革總兵吳鴻源復駕輪船駛赴白塔內港正圖激勵鄉團四面攻剿詎逆於二十七夜縱火比官軍馳至賊已由西南兩門向平和一路竄走吳鴻源等當於二十八日將雲霄廳城收復此各軍攻克平

和縣城並收復雲霄廳城之實在情形也竊李逆世賢由漳州南靖敗竄勢極狼狽官軍乘其喘息未定躡踪緊追連克平和漳浦各城前後殺賊數萬現僅詔安一城未下已咨商郭松林楊鼎勳由漳浦進剿如詔安速克則與平和官軍皆可相機出境追剿惟賊踪雖似假道粵東而侍逆李世賢兇焰已衰入海之望又絕不能不與汪逆勉相倚附汪逆不肯竄粵其台勢竄入江西亦在意中現在婁雲慶一軍因糧餉不繼已折回江境就食如江粵兩省能固守藩籬勿任賊蹤深入而蘇浙

兩軍分路從後躡擊當可收聚殲之效臣宗棠於五月初四日行抵泉州拜摺後卽進駐漳州察看賊蹤趨向無論竄江竄粵均當派兵出境急追斷不敢稍涉諉延致厯

聖念惟江粵邊境被賊蹂躪已久各軍欠餉旣多購運軍米尤非易事深慮未能應手致滯戎機謹當竭力籌維以期戡事此次各軍從漳州追賊直至大埔縣境士卒忍饑力戰實屬勞瘁倍常郭松林楊鼎勳所部前次克復漳州文武各員均未及隨摺請獎茲又攻克漳浦

甚爲得力亟應懇

恩先予獎敘以昭激勵記名提督衛勇巴圖魯黃中元
係武職大員應如何獎勵之處仍候

聖裁記名總兵曹仁美提督銜記名遇缺題奏總兵高
占魁均請以提督記名

簡放記名總兵李長樂謝連陞王萬釗舒義志周河清
均請

賞加提督銜江蘇儘先補用副將洪寶林兩江儘先副
將王興明江蘇補用副將王德駿儘先副將朱興榮均

請

賞給勇號四川儘先遊擊馬宗駿請免補參將以副將
仍留四川儘先補用並

賞給勇號湖南儘先副將張遵道請以總兵記名

簡放已革廣東候補道段喆請開復原官仍留廣東儘
先補用藍翎知府銜遇缺先選同知直隸州知州包國
挺請

賞換花翎廣東補用知府葉文瀾請

賞加鹽運使銜其餘克復平和漳浦雲霄各城在事出

力員弁可否歸入克復漳州案內擇尤彙獎出自

天恩其力戰陣亡之花翎守備周有泉並請

飭部從優議卹以慰忠魂謹會同福州將軍臣英桂恭
摺由驛六百里馳

奏伏乞

皇上聖鑒訓示施行再此摺係由臣宗棠主稿合併陳

明謹

奏 同治四年五月初六日

軍機大臣奉

旨另有旨欽此

同治四年五月二十四日內閣奉

上諭左宗棠等奏官軍追剿竄逆連克平和漳浦雲霄各城一摺福建踞匪自官軍攻克漳州南靖兩城後向平和等處奔竄經左宗棠督飭高連陞等帶兵追擊至五鳳山下該逆拚死回拒兵勇一擁而前聲震山谷逆賊狂竄自相踐踏死者甚眾四月二十七日進攻磁洋等處賊壘官軍四面圍殺兩壘之賊無一漏網進搗楚礮安下賊巢立破堅壘十餘座侍逆李世賢等共率賊

黨數萬來援官軍分路山擊高連陞等率各軍從山頂
繞出賊後賊陣始動官軍乘勢衝擊賊匪奔潰侍逆倉
皇無措繞城而走逆賊開西門狂竄各軍衝殺入城斃
賊數千自相踐踏及墜巖落水死者無算侍逆亦連馬
墜於橋下追殺二十餘里立將平和縣城收復其郭松
林楊鼎勳兩營進紮長橋先將博孝嶺之賊卡攻破直
抵漳浦城外城賊分門出拒胡仁美等從東西兩面首
先接仗屢戰連勝各營一擁齊上賊眾皆潰遂乘勢掃
蕩城外各壘二十六日夜間城賊由南門竄走楊鼎勳

等督隊分門殺入城內於二十七日丑時將漳浦縣城
攻克雲霄縣逆知漳浦克復其勢已孤已革總兵吳鴻
源復駕輪船駛至該逆於二十七日夜縱火由西南門
向平和一路竄走遂將雲霄廳城收復剿辦甚爲得力
卽著左宗棠等嚴飭各軍將逃竄各匪奮力搜剿毋畱
餘孽所保攻克漳浦出力之提督黃中元等前經李鴻
章於克復漳州案內開單請獎業已明降諭旨給予獎
勵守備周有泉亦經照李鴻章所請給予優卹此次所
保之總兵高占魁是否卽李鴻章前次奏保之高占彪

著該督等查明具奏其餘克復平和漳浦雲霄出力員弁著准其覈人漳州案內擇尤保奏欽此

軍機大臣 字寄

欽差大臣大學士湖廣總督一等果威伯官文兼署兩廣總督廣州將軍瑞麟閩浙總督一等恪靖伯左宗棠福建巡撫徐宗幹江西巡撫劉坤一湖南巡撫李瀚章廣西巡撫張凱嵩署廣東巡撫郭嵩燾傳諭署浙江提督一等子鮑超護理江西巡撫布政使孫長紱同治四年五月二十四日奉

上諭左宗棠等奏官軍追剿竄賊大獲勝仗連克平和等城瑞麟等奏東路防軍剿賊獲勝現籌辦理情形李瀚章奏霆營叛卒竄至攸縣卽經官軍擊退現飭分馳剿辦鮑超奏傷疾舉發懇懇續假各一摺已明降諭旨將連克平和漳浦雲霄等城及大埔防軍獲勝情形分別宣示矣平和等城既經克復詔安一城前據李鴻章奏亦有探聞攻克之信是閩省賊勢漸就肅清惟李汪二逆合股奔竄旣不得逞志於粵東必將糾合大隊竄入江西左宗棠當懷遵五月十八日諭旨親督全軍越

境追躡務與江西防軍會合夾擊殄滅淨盡不得以驅
賊出境爲了事瑞麟郭嵩燾仍督飭李福泰方耀等嚴
督兵勇認真防剿毋狃於大埔一勝遂生懈弛劉坤一
已簡放江西巡撫著卽恪遵前旨速赴新任將江省防
守事宜嚴密布置劉坤一未到以前著孫長絨飭令王
文瑞等軍實力扼剿毋稍疏虞雲慶所部勇丁旣經
撫定卽可飭令該軍駐紮由閩入江要路遇賊卽擊以
壯聲勢而固藩籬靈營叛卒由江西萍鄉竄至湖南攸
縣雖經官軍擊退而逆踪已向安仁一路竄走並渡河

焚舟以阻追兵其謀甚狡著李瀚章督飭水陸防軍兼
程追剿相機分隊繞出賊前迎頭攔截迅殄賊氛席寶
田一軍已抵茶陵並著孫長紱檄令會合楚軍四面兜
剿以期一鼓殲滅成大吉等軍前有旨令其越境追賊
此時行抵何處仍著官文查明具奏一面飭令探明潰
勇趨向相機合剿不准遷延觀望致干重咎署攸縣知
縣傅以綏攸縣汛把總黃占魁於賊匪竄近邊界未能
嚴密堵禦致被乘虛闖入雖經當時擊退肅清縣境究
屬疏於防範均著革職留營以觀後效前因霆營勇卒

背叛梟經飛諭鮑超停止西征毋庸出關迅赴湖北辦理此事此次鮑超籲懇續假自係尙未接奉前旨故有是請現在叛勇已擾及攸縣安仁一帶事機孔急著鮑超懍遵疊次諭旨一面趕緊調治一面東裝赴鄂探明叛勇蹤跡分別剿撫遣散卽赴江閩剿除髮逆以副委任倘再遲延不前任令舊部勇眾日益蔓延自問當得何罪此起叛勇蹤跡飄忽若由郴桂一帶趨往西南兩廣地方處處可通與竄粵髮逆亦可勾合爲患更大著瑞麟郭嵩壽張凱嵩各飭兵弁擇要嚴防毋稍大意將

此由六百里諭知官文瑞麟左宗棠徐宗幹劉坤一李
瀚章張凱嵩郭嵩燾並傳諭鮑超孫長敘知之欽此

收復詔安首逆乞降截剿逆賊疊勝情形摺

奏爲官軍收復詔安縣城首逆乞降截剿雲霄漳浦竄
出逆賊首逆就殲餘氛淨盡疊獲大勝並截剿江逆大
股現籌辦理情形恭摺馳

奏仰祈

聖鑒事竊郭松林楊鼎勳兩軍將漳浦縣城克復後卽
飭提督曹中元易用剛總兵王萬釗由雲霄進圖詔安
四月二十九日甫拔隊前進適詔安之賊數千竄至距
雲霄三十餘里之梅村地方正與官軍相值王萬釗曹

仁美李長樂謝連陞等首先衝入賊陣郭文武洪寶林馬宗駿各營繼之鏖戰一時斃賊數百名賊猶死拒不退易用剛黃中元等從村後繞出賊背兩面夾擊賊遂敗潰越嶺而逃當因大雨收隊各營卽駐梅村初一日兩營易用剛黃中元等復派馬隊先進步隊繼之行至中途擒獲賊探訊知漳浦雲霄各城克復後城逆驚恐異常卽督隊乘夜疾進比抵城下該逆已於是夜向烏山一路竄走當會同廣東官兵將縣城收復其竄出餘逆圖向沿海逃匿復經已革總兵吳鴻源水師截擊斃

賊三百餘名此收復詔安縣城之實在情形也高連陞等痛剿李世賢等各逆於平和克獲大捷立復縣城後正擬躡蹤追剿行四十里忽接探報雲霄漳浦敗賊二萬餘人已竄近平和急率各營回擊四月二十九日高連陞黃少春劉清亮各率所部五成隊向大溪一路迎剿甫至離大溪十餘里地方賊已大至把總會殿魁約會各姓團丁從後追至高連陞等卽麾各營猛擊逆賊紛紛潰竄官軍團丁前截後追賊眾無路可竄黃少春所部哨官葉春嵐擒偽天將陳有才胡艾森偽凜王領

袖張生不訊供守漳浦之偽凜王劉肇鈞已被逼自裁
守雲霄之偽列王朱義得亦經官軍陣斬惟偽祥王黃
隆芸率悍黨數百翻山而遁高連陞黃少春劉清亮卽
率隊上山縱殺見數十賊方擁一騎馬賊倉皇奔走知
爲逆首花翎都司周培仁向王隆刺該逆落馬斷其左
臂縛之而歸訊之卽偽祥王黃隆芸也其餘護從之偽
天將朝將神將天義天福等賊目悉被擒斬無一漏網
棄械投降者數千各鄉團丁殺斃者亦數千此股遂殲
除淨盡其先由平和敗竄之偽利王朱逆僞來王陸逆

兩股王德榜馳抵平和二十九日卽率所部蹣踪追至
大埔縣境該逆前被粵軍截擊後被王德榜各營追殺
殲斃無數羣賊震懼其赴王德榜軍前乞降者四千餘
人內有偽天將郭楊維朱陸明秦三芸劉大德余福來
錢鳳笙神將何華炳何亞炳許天祿朱湖趙升朝將艾
孫武總檢徐添寶同檢阮黃吉編修馮祥雲提點化振
馥天義朱大保天預周昌發楊正興趙廷玉天安郭寶
申得興功醫蔣永瑞等賊目二十四名滿髮悍賊一百
五十四名訊皆積年漏誅劇賊則盡誅之並據降賊供

稱僞利王朱逆已經官軍陣斬矣此各軍截剿漳浦雲
霄竄賊悉數殄除並追剿平和敗賊大獲全勝之實在
情形也王德榜收軍回至平和適永定警報踵至高連
陞等趨援永定王德榜遂畱駐平和五月初五日詔安
逆首丁太洋一股又竄至白土王德榜卽飭副將林珠
何秀清總兵戴奉聘三營沿河而下截之時丁逆太洋
前隊已渡過萬餘人林珠趕到急率所部從河邊衝出
逆眾擁擠浮橋中斷溺斃無算戴奉聘何秀清分兵截
殺賊仍拚死抗拒王德榜親督李運勝柳玉清戴清耀

各營馳至兩面夾擊賊大奔潰官軍乘勝縱擊斃賊四千餘名生擒二百餘名奪騾馬三百餘匹丁逆率其黨由間道翻山竄至下垵苦竹繞過龍潭一日行八十里遙撲劉典坎市行營劉典方飭所部擊賊未歸賊至憑土樓以守調各營馳回來擊破之丁逆向高陂橋竄走道員李耀南及各營從太陽壩扼之竄路悉絕十三日丁逆太洋遂率眾并繳偽印四百餘顆赴劉典軍前乞降劉典以丁太洋勢蹙來歸殺之不武許之惟其黨桀悍不願回籍者尙多暫須酌量挑畱免致仍流爲賊黨

令丁太洋挑選千人隨同剿賊立功餘悉薙髮繳械賞
遣以歸此丁太洋一股屢經官軍痛剿旋即就撫之實
在情形也其汪逆海洋一股自大埔回竄永定總兵王
開琳飭丁長勝分軍扼紮距城三十五里獵射四屢戰
皆捷汪逆於四月二十日以一股直撲永定縣城一股
分犯獵射四營壘先於要隘分築四壘以絕永定赴援
之路晚間復又添築數壘困之丁長勝忍饑力戰相持
兩晝夜至二十二日米糧火藥俱盡該逆攻破兩壘丁
長勝尙誓死以守逆賊愈裹愈厚圍至午刻羣賊破壘

入而丁長勝力竭陣亡各營隨陷劉典得報卽飛飭已
革參將劉大謨副將齊蘭禮都司張星元兩營會同延
建邵道康國器所部馳往援剿時該逆已將永定縣城
四面築壘逼圍矣二十三日康國器馳抵湖雷二十四
日卽飭各營將羅灘浮橋斬毀斃賊百餘名二十五日
汪逆喉傷而王黃逆爲王周逆僞列王羅逆僞天將
翟逆率悍黨數萬分七路來撲湖雷官軍營壘康國器
飭副將吳光亮參將林本詹惠遊擊羅洪標熊應烈知
府康熊飛都司關鎮邦署龍巖營遊擊賴長等各營分

路迎敵鏖戰十餘合斃賊六七百名賊猶拚死拒戰康國器令康熊飛率隊從右路抄出林本熊應烈乘勢逐之賊敗上山官軍追及賊復結陣抗拒林本詹惠熊應烈各率數十騎直取搖旗賊目賊駭而奔時左路之賊亦經關鎮邦所部各營擊敗殺賊七百餘名生擒五十餘名當官軍從左右兩路截出時該逆突出悍黨萬餘直撲吳光亮營壘康國器飭羅洪標率隊前往助之鏖戰兩時適各軍將左右兩路之賊擊敗轉戰而來劉典所部劉大謨齊蘭禮張星元又率兩營繼至遂與吳光

亮等三路進擊賊勢不支紛紛潰竄官軍追至羅潭始
行收隊計是役共生擒悍賊四百餘名斃賊二千餘名
內有紅衣黃衣等賊目百餘名拔出難民千餘名二十
六日汪逆復率悍黨數萬傾巢來撲康國器一面飭各
營固守營壘一面約會劉典所部各營列隊左手山岡
防賊抄襲相持兩時該逆突起猛撲康國器飭各營奮
力迎擊往來決盪十餘次該逆屢卻屢前官軍步逼步
進斃賊六七百名賊敗走官軍乘勢追殺汪逆連斫數
賊親督紅衣悍賊二千餘分路來援敗賊亦拚死回鬪

血戰一時康國器復飭關鎮邦所部各營馳往援應各軍大呼奮擊鎗礮火箭彈一時併發轟斃賊目多名賊隊遂亂官軍奮威前進銳不可當賊大敗潰汪逆阻之不能止退過後山康熊飛關鎮邦熊應烈袁岳雲督勇一擁齊上奮據嶺鎮林本馮南斌將閣坑伏賊搜剿淨盡吳光亮吳光忠林福喜將屯踞山邊之賊擊敗亦各率隊衝殺而前該逆尙圖從旁抄擊遊擊賴長率所部從溪口越嶺而下各逆始紛紛越嶺逃竄汪逆見各路之賊俱敗官軍四面緊逼倉卒間亦僅率悍黨數百遁

去官軍乘勝追殺計共斃賊三千餘生擒悍賊二百餘
名劉典所部由左路迎擊亦斃賊六七百名二十七日
官軍復分三路進剿康熊飛詹惠林本中路之軍甫抵
劍灘該逆望風潰竄適吳光亮熊應烈關鎮邦等兩路
馳至卽督勇破棚而入立將賊壘踏毀斃賊數百名汪
逆勢不能支於是夜向永定西北一路竄走劉典復飭
李耀南張福齊楊鼎勳所部馳往援應總兵劉明珍亦
率隊從撫溪而來遂於二十八日與康國器合軍追殺
沿途斃賊甚多拔出難民千餘奪獲牛馬輜重穀米無

算正追殺間忽僞陪王譚逆僞天將林逆一股竄至經
劉典所部圍殺四五百名生擒二百餘名二十九日劉
典康國器兩軍復於劍灘截擊擒斬衝散殆盡劉典率
各營回坎市飭副將張福齊同知楊鼎勳駐湖雷詎侍
逆敗黨又接踵竄至永定三十日僞王宗李元茂僞來
王陸順德兩股約數千搶渡而過餘因溪水迅漲未能
過渡初二日康熊飛率各營馳至與王開琳所部截擊
斃賊無算收降數千聞該逆大股尙在獵射凹初三日
楊鼎勳劉春藻張福齊朱定元彭俊光蕭雅泗各營分

路追殺陣斬僞王宗李學金乘勝轉戰至永定河邊該
逆正齊隊西渡經官軍扼截仍卽卻回前已降復叛之
劉得義率黨首先衝突官軍指認排銳驅擊劉得義中
鎗落馬都司張佑廷斬之賊隊大亂官軍奮威衝殺斃
賊約四五千正追殺間後股又來搶渡蕭雅泗奮勇衝
入賊中手刃賊目數名賊大恟懼悉棄械伏地乞降張
福齊等勒馬受之約萬餘名其另股僞天將何春貴龔
成業尹得明僞神將張永盛陳金劉政宏曹得茂僞指
揮胡位才余向陽率其黨二萬四千餘名赴王開琳軍

前乞降據何春貴等稟供侍逆實於初二夜帶傷從十數賊策馬過河擬奔注海洋賊營維時中流湍急多被溺死侍逆已無下落觀於何春貴劉政宏等均侍逆平日親信賊目而皆紛紛乞降又汪逆自二十七日由永定敗竄現據上杭中都一帶尙揚言候侍逆到合力衝犯則侍逆未到汪海洋賊營可知但竇已溺斃與否因無確然證據未敢妄奏此汪逆逼圍永定官軍血戰克獲大捷城圍立解並截剿侍逆全股殲滅殆盡之實在情形也竊維閩之賊約有四大股一爲李世賢一爲

汪海洋一爲丁太洋一爲林振揚現丁太洋業已敗蹙
投誠李世賢餘黨所剩不過數千林振揚夥黨亦擒斬
衝殺殆盡惟汪海洋一股人數尙有數萬經各軍疊次
剿辦之後兇燄尙張現高連陞黃少春兩軍已進駐距
上杭二十五里之盧峰劉清亮一軍卽日繼進康國器
紫永定劉典紫龍巖永定交界之坎市道員張恆祥赴
汀州總兵劉明珍赴連城閩省沿邊節節皆有布置如
江粵防軍能於邊境合力兜剿則逆賊無隙可乘自可
收聚殲之效惟現接江西咨報靈營叛卒已竄袁吉之

交婁雲慶所部霆軍已先由會昌赴贛席寶田劉勝祥
兩軍均調赴吉安其贛南道王文瑞所部新湘九營隨
王開琳駐永定防剿者廿二口之挫復潰失六營贛甯
一帶空虛汪逆志圖竄江設與此股叛卒互相勾結其
敵必將復熾劉典已咨商王開琳將收集新老各營率
赴江西贛州防剿臣宗棠初十日馳抵漳郡一面趕籌
糧運一面督飭各軍盡力躡追以冀迅掃餘氛仰紓
宸廑所有永定撤射四各營失陷詳細情形尙未接王
開琳稟報查是役雖由城壘隔絕米糧匱乏軍士饑疲

致挫並非守禦不嚴惟王開琳身當統領失陷數營咎有應得應請

旨將記名總兵王開琳革職留營以期後効其力戰陣亡之遇缺題奏總兵丁長勝前隨湖南已故道員王鑫轉戰江鄂數省屢著功績自隨臣宗棠征剿六載受重傷數次樸訥勇敢在將領中實爲難得上年截剿蘇皖竄賊並克復江西東鄉縣城論功應保提督茲以力竭捐軀深堪憫惜合無仰懇

天恩俯准將丁長勝照提督例

賜卹

予謚並附祀湖南王鏊專祠陣亡福建補用遊擊陳觀
光克復龍巖計功應保參將應請

旨照參將例從優議卹以慰忠魂其餘陣亡員弁容俟
查明再行請

卹其各戰尤爲出力將弁兵勇忍饑血戰迅厲無前容
臣等查明歸入全省肅清案內彙請從優

獎敘投誠之丁太洋雖窮蹙乞降與事前自拔來歸者
有間惟挑畱悍黨悔罪歸誠尙屬明於順逆可否

賞給守備職銜令其立功自贖之處出自

天恩理合恭摺馳

奏伏乞

皇上聖鑒訓示施行再此摺係由臣宗棠主稿合併聲

明謹

奏同治四年五月二十二日

軍機大臣奉

旨另有旨欽此

附陳攻克南靖縣城詳細情形片

再攻克南靖縣城大概情形業經臣等馳奏在案茲據劉典呈稱肅清奎洋苦竹梅杯場校等處後卽飭道員李耀南總兵楊芳桂副將張福齊同知楊鼎勳各營會同道員張恆祥一軍進規南靖四月十九日李耀南等攻破緘口寨堅壘五座殺賊四五百名忽南靖上社小溪山城各處之賊分路來援勢極兇悍官軍排礮轟擊賊復分隊抄來適張恆祥從右路搜剿而出張福齊楊鼎勳亦率所部從中路楊芳桂李耀南率所部從左路同時並進鏖戰兩時賊敗復回者數次張恆祥張福齊

兩軍愈戰愈猛各營乘之賊大敗計共斃賊千餘名生擒百餘名奪獲騾馬三十餘匹李耀南楊鼎勳等正圖襲取山城詎該處踞逆經官軍擊敗後已於二十夜向小溪遁去遂約會各軍於二十二日分路進攻南靖先夜參將周顯名都司張佑廷等各挑勇丁三十名攜帶火箭火彈至近城西南一帶燃放總兵劉明珍亦派隊由城東而來號聲四起煙焰飛騰城賊壘賊驚惶失措適漳州府城於亥時攻克漳逆敗至南靖者先行奪路竄走城賊愈難站腳官軍大隊乘勢奪門而入時王德

榜正從東路轉戰而來羣賊叫號亂擲或伏地乞降或
拚死衝圍李耀南楊芳桂等收降四千餘人其奪路竄
走者經官軍截殺殆盡當於二十二日將南靖縣城克
復竊劉典一軍從汀連節節掃蕩而下連破逆賊堅壘
數十在事各員均未隨摺請獎此次攻克南靖斃賊甚
多尤屬異常奮勉所有最爲出力之總兵銜藍翎副將
張福齊請

賞換花翎鹽運司銜浙江補用道李耀南請

賞加按察使銜並

賞給該員祖父母父母正三品封典藍翎浙江補用同知楊鼎勳請

賞換花翎並加知府銜改畱福建補用總兵銜副將齊蘭禮請以總兵記名

蘭放副將文繼昌請

賞加總兵銜參將宋定元陳集賢請以副將畱於閩浙補用已革副將銜參將劉大謨請開復原官並免繳捐復銀兩儘先都司張星元都司張佑廷花翎都司唐得勝賀潤蘭劉春藻請以遊擊畱於福建補用五品軍功

蕭雅泗田向陽請以都司留於福建補用並

賞戴花翎花翎安徽補用直隸州知州喻步蓮請補缺
後以知府補用先換頂戴以示鼓勵二品頂戴劉典係
幫辦大員盡瘁馳驅勳績卓著應否

加恩之處臣等未敢妄擬理合附片具

奏伏乞

聖鑒施行謹

奏 同治四年五月二十二日

軍機大臣奉

旨另有旨欽此

同治四年閏五月十四日內閣奉

上諭前據瑞麟郭嵩燾奏粵軍越境攻克平和詔安兩縣城大埔防兵獲勝本日左宗棠徐宗幹奏閩軍攻復詔安首逆乞降截勦逆賊疊勝各一摺情形大略相同閩軍克復漳浦後提督黃中元等進圖詔安會同粵軍將詔安攻克雲霄漳浦敗賊二萬餘人竄近平和經高連陞等迎擊生擒偽祥王黃隆芸餘賊殲除淨盡其偽利王宋逆等股亦經王德榜勦斃無算餘賊投械乞降

詔安逆首丁太洋竄至白土王德榜率軍夾擊斃賊四千餘名丁太洋勢蹙率眾赴劉典軍前乞降汪海洋自大埔回竄永定道員康國器督隊赴援斃賊數千名逆勢不支向永定西北竄走侍逆敗黨續竄永定獵射四等處楊鼎勳等分路追殺斃賊甚多收降數萬粵軍聞閩軍逼賊漸近卽分路併力夾擊方耀鄭紹忠等連日鏖戰殲賊萬計擒斬逆首多名協同閩軍將平和詔安兩縣城克復辦理均爲得手瑞麟等摺內所保尤爲出力之記名總兵方耀著賞加提督銜都司鄭紹忠著以

副將畱於廣東補用遊擊林詩成著以遊擊儘先補用
並賞加參將銜都司陳乳著以遊擊補用守備方鰲等
六員均著免補守備以都司補用並賞換花翎千總侯
玉等六員均著免補千總以守備補用雲騎尉方傑著
以守備補用以上七員並賞加都司銜把總林材著以
千總儘先拔補並賞加守備銜軍功徐桂祖等七名均
著以千總歸營儘先拔補並賞戴藍翎徐桂祖劉順昌
並賞加守備銜左宗棠等摺內所開陣亡總兵丁長勝
著照提督陣亡例議卹並加恩予諡准其附祀湖南道

員王鑫專祠補用遊擊陳觀光著照參將例從優議卹
記名總兵王開琳於所部獵射四營盤失陷丁長勝戰
歿未能救援實難辭咎著革職留營以觀後效此次出
力各將弁兵勇著左宗棠查明彙案請獎投誠之丁太
洋著賞給守備銜賈令立功贖罪左宗棠等另片奏攻
克南靖詳細情形劉典一軍進規南靖分路並進殺賊
千餘名收降四千餘人立將南靖縣城克復所有尤爲
出力之副將張福齊著賞換花翎浙江補用道李耀南
著賞加按察使銜並賞給該員祖父母父母正三品封

典浙江補用同知楊鼎勳著賞換花翎並賞加知府銜
改留福建補用副將齊蘭禮著以總兵記名簡放副將
文繼昌著賞加總兵銜參將宋定元等二員著以副將
留於閩浙補用已革副將銜參將劉大謨著開復原官
並免繳捐復銀兩都司張星元等五員均著以遊擊留
於福建補用五品軍功蕭雅泗等二員均著以都司留
於福建補用並賞戴花翎安徽直隸州知州喻步蓮著
俟補缺後以知府補用先換頂戴候補按察使劉典督
軍入閩膚功迭奏深堪嘉尚著賞給白玉柄小刀一把

白玉搬指一箇大荷包一對小荷包二箇火鐮一把以示優異該部知道欽此

軍機大臣 字寄廣州將軍兼署兩廣總督瑞麟閩浙總督一等恪靖伯左宗棠福建巡撫徐宗幹署廣東巡撫郭嵩燾傳諭護理江西巡撫布政使孫長紱同治四年閏五月十四日奉

上諭左宗棠等奏收復詔安首逆乞降截剿雲霄漳浦竄賊疊獲大勝首逆就殲並截剿大股及劉典一軍攻克南靖各摺片本日已明降諭旨照所請分別獎卹並

賞給劉典小刀搬指等件瑞麟等前奏請獎敘之方耀
等亦併降旨照准矣丁太洋投誠已照左宗棠所請賞
給守備銜著卽令其督率挑畱悍卒隨隊攻剿如不得
力仍當嚴行懲辦遣散降人沿途能否安靜著咨明各
督撫督同地方官嚴行約束以免復行勾結李世賢是
否被水沖沒仍著查明實在下落具奏汪海洋一股人
數尙眾現在上杭一帶盤踞高連陞等軍已駐盧峰劉
清亮一軍亦剋日繼進著該督卽飭諸軍設法進剿並
杜其旁竄之路毋令再擾完善上杭距粵東之大埔饒

平江西之會昌長甯等處均屬切近著瑞麟等督同李
福泰將潮防各軍實力整頓方耀等軍如能出境會剿
卽飭該總兵等奮勉圖功爲一勞永逸之計賊氛逼近
贛甯江省東路之防倍緊前諭調郭松林楊鼎勳二軍
赴江閩交界處所駐紮該督會否調派叛勇去江已遠
席寶田等軍現紮何處著孫長絃酌度情形趕緊調赴
贛甯一帶扼防左宗棠仍遵前旨不分畛域派兵赴江
迎前兇剿勿任闖入完善南靖克復劉典一軍聲威甚
壯應如何調派之處著該督妥爲調度以期速竟全功

同膺懋賞永定獵射四各營失帽詳細情形仍著查明具奏王開琳已革職畱營著卽飭令收集各營迅赴江西贛州防剿立功自贖倘再有疏虞定卽從重治罪將此由六百里諭知瑞麟左宗棠徐宗幹郭嵩燾并傳諭孫長紋知之欽此

奏報全閩肅清現飭越境追剿摺

奏爲官軍追剿獲勝全閩肅清現飭越境追剿恭摺馳
奏仰祈

聖鑒事竊高連陞黃少春劉清亮等駐軍平和將漳浦
雲霄竄賊悉數殲除後因永定警報踵至卽各率所部
馳援比抵永定汪逆已經各軍擊敗向上杭中都竄走
待逆餘黨亦續由大姑灘逃逸高連陞黃少春等躡蹤
緊追五月初十二等日出隊至大姑灘對岸該逆尙
率眾渡河回撲經官軍排鎗轟擊斃賊甚多賊敗走旋

偵知賊之先至上杭西門外上墩鄉與武平之象洞汪逆均調來中都仍圖回撲官軍適知府魏光祚所部及高連陞黃少春兩軍留駐漳州四成隊馳至十五日黎明高連陞遂率各營進紮大姑灘下黃少春各營進紮大姑灘上均於沿河密布營壘時悍賊數千將所紮木牌千餘架搬至河邊正圖搭架浮橋官軍突至鎗礮齊發汪逆亦令隨身洋鎗悍黨拚死抗拒官軍縱擊歷三時之久斃悍賊數百名帶傷者無算賊猶死拒不退高連陞黃少春各挑洋鎗隊百人潛從大姑灘上下踰淺

過河抄擊瞥見各山頭號火齊起知汪逆方嗾羣賊來
援高連陞等麾洋鎗隊及其未至邊前薄之轟斃頭旗
悍賊一名羣賊驚駭乃棄馬翻山而遁河邊搭橋之賊
與山頭來援之賊亦同時竄走官軍乘勢壓擊斃悍賊
一二百名生擒二十六名墜巖落水死者不計時劉清
亮留駐湖雷各營因丁太洋一股業已擊敗投誠後路
無事亦率所部馳至會商十七日卯刻分三路過河痛
擊詎該逆敗後膽落卽夜奪路狂竄官軍追殺二十餘
里斃賊無算生擒三十一名拔出難民數百餘逆悉竄

武平署武平縣知縣八十四飛稟告急高連陞等急率
四成隊赴之派馬隊先進偵知該逆尙踞中赤巖前一
帶十九日疾馳百里至武平所二十日追至風車坊見
賊千餘方屯聚山下各村官軍追至立斃賊百餘名生
擒七名各館之賊一齊驚走又追二十里始收隊回武
平縣城二十一日黃少春高連陞劉清亮正分路進剿
中赤之賊詎該逆經官軍迭次擊敗已回下壩逃竄官
軍追及僅斬尾賊二百餘名生擒四十餘名救出難民
三百餘據獲賊供稱汪逆本嶺巖前之地先竄鎮平因

粵軍扼截折回下壩現經官軍追擊仍向粵東邊界竄去高連陞黃少春劉清亮已率軍進駐下壩計各戰擒斬逆賊實不下三四千名拔出難民無算此各軍追剿獲勝閩境肅清之實在情形也竊維李世賢汪海洋等逆上年九月由江粵突竄閩疆連陷府廳州縣凡七人數實二十餘萬加以閩粵土匪從亂如歸首逆李世賢復以重利啖洋人購其鎗礮勾其助逆勢甚鴟張幸賴聖謨廣運飭浙軍迅赴戎機資以浙餉復以地廣兵單飭蘇軍赴閩助剿數月之間得將各城次第克復全境

一律肅清李世賢林振揚兩股擒斬殆盡丁大洋一股
屠燬投誠僅餘汪逆一股夥黨數萬逼聚江西閩粵三
省交界之區勢孤力薄可冀就殲現因該逆出沒閩粵
之交爲各軍所扼不能竄越江西轉竄粵境直趨嘉應
州臣等已飭康國器及關鎮邦所部粵勇五千餘人由
峰市追剿冀與粵東嘉應官軍共收夾擊之效惟汪逆
本謀在竄江西似不久留粵境臣等已飭王開琳率所
部老湘營由汀赴贛已報啟行其高連陞黃少春劉清
亮三軍轉戰閩粵之交馳驅千里實形勞瘁應暫留武

平休息覘賊所向截之其劉典一軍俟整理就緒後亦
卽由汀赴贛或逕赴南安截其由江西竄湖南之路期
將此股殲除稍紓

慈廕斷不敢存齷齪自守之見亦不敢居越境勦賊之
功所有此次各軍追剿竄賊疊獲全勝出力將弁兵勇
及防剿轉運出力員弁可否併由臣等查明彙案請
旨獎敘之處出自

天恩理合會同福州將軍臣英桂恭摺由驛馳
奏伏乞

皇上聖鑒訓示施行再此摺係臣宗棠主稿合併聲明
謹

奏

同治四年閏五月初五日

軍機大臣奉

旨另有旨欽此

請將剿賊大勝殲除要逆之康道等獎卹序

再延建邵道康國器一軍於四月二十九日從永定劍
灘截剿獲勝後於五月初二日復親督各營行至塔下
見該逆搭有浮橋三座前股正在渡河康熊飛吳光亮

詹惠林本馮南斌卽各率所部直搶浮橋關鎮邦袁岳
雲朱安劉金趙鵬馮國安擊其山下羅洪標熊應烈擊
其山上湯彪周有才繼之該逆見官軍分路突至亦悉
銳來迎官軍鎗礮齊施賊不少卻其未及渡河者仍死
拒浮橋結陣以待康熊飛吳光亮林本令林檳林福喜
陳羅挑健勇數十名繞從道旁以鎗礮仰攻賊背羣賊
驚潰官軍乘勢急進擒斬逆賊二千餘名追逼落河淹
斃者六七千名遂將浮橋三座一齊拆毀山上下之賊
亦同時潰退官軍分路兜剿而上又生擒千餘名殺斃

二千餘名各逆號哭之聲響震山谷康國器傳令棄械投誠者免死同時跪伏道旁者約萬餘人康國器受之初三日又飭各軍跟蹤追剿收降餘黨三千餘人訊據僉供侍逆寶已受傷落河身死矣並據稱初二日之戰僞天將潘起亮僞朝將劉貴幅均已落水淹斃僞天將曾洋貴陸連幅僞朝將鄧雲貴等均經官軍陣斬其餘賊目之或散或降及殺斃淹斃者尙不可勝計除飭將降眾妥爲賞遣外查五月初二之戰康國器一軍實爲出力臣等前次奏報其時未接康國器稟牘漏未詳敘

茲合補陳以彰戰績按察使銜延建邵道康國器自力
解永定重圍後連獲大捷勞績卓著應請
賞加布政使銜其力戰捐軀之花翎補用都司劉振伍
克復龍巖計功應保參將請

旨照參將例議卹以慰忠魂理合附片具
奏伏乞

皇上聖鑒訓示施行謹

奏

同治四年閏五月初五日

軍機大臣奉

旨另有旨欽此

陳明侍逆業已伏誅片

再李逆世賢自平和帶傷後五月初二夜偕十數賊在永定過河淹斃業經前奏聲敘及之茲據各路軍營稟報訊之生擒賊目及各降人所供侍逆溺斃係五月初二夜事均無異詞而漳城逃出難民則言侍逆於初二夜同數賊棄馬逃走因不識路逕繞山奔竄天明仍在原處鄉民獲住搜出隨身金葉五十餘兩旋爲官軍揪去一時喧傳侍逆業已就擒又似侍逆未及過河已就

擒者未據各軍稟及殊難憑信惟續獲汪海洋股內黨夥及逃出難民均供汪逆在上杭中都時久候侍逆不至一日傳集各賊目將奔投之僞王宗李逆等械繫稱侍逆已死於下洋而僞王宗收護不力應卽議罪劉典前駐軍坎市時曾盤獲汪逆所遣賊探密覘侍逆下落者是侍逆之已伏誅確無可疑惟溺死永定河中與獲斬於下洋則尙難確指也臣等仍當畱心訪察以期核實謹附片陳明伏乞

聖鑒謹

奏 同治四年閏五月初五日

軍機大臣奉

旨另有旨欽此

請調援閩得力之軍回蘇聽候調派摺

奏爲請調援閩得力之軍回蘇聽候調派恭摺馳陳仰
祈

聖鑒事竊臣接署兩江督臣李鴻章抄摺咨會飭前派
援閩之提督郭松林楊鼎勳兩軍由閩繞赴江西湖南
邊界相機迎堵服其洞燭賊情謀慮深遠實非臣愚陋

所及惟李鴻章入奏時尙未知逆首李世賢丁太洋林振揚各股或降或散或剿除殆盡疑賊氛尙熾故擬以此軍爲馳援數省之師茲查由閩竄粵之賊實祇汪逆海洋夥黨數萬縱各股尙有漏出人數諒必無多臣已檄康國器率所部及關鎮邦所部合計五千人由永定虞峰取道入粵冀以粵人援粵戰於其鄉士氣自信可收夾擊之功又竊以汪逆志在竄江官軍入粵祇是尾追益援粵之師恐徒速其竄江之勢似不如何其竄又江西迎頭截擊較爲得之現飭王開琳率所部入江西

贛州高連陞黃少春劉清亮暫駐武平劉典將各軍整理後卽馳赴汀州駐武平者將趨長甯安遠以固贛東駐汀州者將由贛州趨南安以固贛西卽兼爲固湘之計也如天之福三省合力或可將此股就地殲除不致久稽

天討是蘇軍不入江西湖南於局勢尙似無損臣前聞直東軍務喫緊未得其詳昨准李鴻章來咨始知曾國藩將赴山東李鴻章暫署兩江督篆捻逆披猖特甚時事方殷似兩省兵力宜厚而不宜薄郭松林楊鼎勳所

部多勇敢之士所習洋鎗礮隊必非捻逆所能當且淮
北皖北之人實居大半用之北方服水土而少疾病得
力無疑臣愚以爲就天下大局而論直東爲重閩粵江
西爲輕就此時賊勢而論閩粵江西爲緩而直東較急
是蘇省援閩之軍仍應調回蘇州以備曾國藩李鴻章
調度明矣至兩軍回蘇或應由海道抵滬或取道江西
水陸入皖臣已一面檄商郭松林楊鼎勳自行酌度臣
當籌畫資遣理合恭摺馳
奏伏乞

皇上聖鑒訓示施行謹

奏同治四年閏五月初五日

軍機大臣奉

旨另有旨欽此

軍機大臣 字寄廣州將軍兼署兩廣總督瑞麟杭州
將軍崑壽閩浙總督一等恪靖伯左宗棠福建巡撫徐
宗幹署廣東巡撫郭嵩燾傳諭護理江西巡撫布政使
孫長紱同治四年閏五月二十六日奉

上諭左宗棠等奏官軍剿賊獲勝全閩肅清現飭越境

追剿請援閩得力之軍回蘇及查李世賢下落各摺片
覽奏均悉汪逆由上杭中都敗走經高連陞等追至武
平該逆由下壩先竄鎮平復由粵東邊界竄去有直趨
嘉應州之勢左宗棠已飭康國器及關鎮邦所部粵勇
五千人由峰市追剿此軍到粵必可得力著瑞麟郭嵩
燾督飭方耀等會同閩軍認真擊剿李福泰已移紮嘉
應諒已早有布置卽著飭令該藩司等三面兜擊以期
一鼓殄除勿任再有竄逆高連陞黃少春劉清亮等軍
暫駐武平稍爲休息仍著左宗棠飭令規賊所向實力

遏截以資得力注逆本謀竄江未必久畱粵境孫長紱
務當懷導迭次寄諭將贛防密爲布置督飭派出諸軍
與左宗棠所派之王開琳一軍實力防剿毋任逆蹤竄
近邊界方爲妥善劉典一軍或由汀赴贛或徑赴南安
截其由江西竄湖南之路著左宗棠斟酌軍情緩急調
派所有此次追賊出力各軍及防守轉運各員弁著該
督查明彙案擇尤保奏李世賢一犯或云衝沒或云被
擒或云自刎尙無實在下落仍著查明具奏郭松林楊
鼎勳二軍卽照左宗棠所請飭令迅速回蘇聽李鴻章

調遣本日已諭知李鴻章檄調本高連陞已簡放廣東
陸路提督左宗棠卽飭該員俟軍務稍定赴任其所署
浙江提督另派黃少春署理崑壽已放杭州將軍著俟
到任後將旗營一切事宜妥爲經理以副委任將此由
六百里諭知瑞麟崑壽左宗棠徐宗幹郭嵩壽并傳諭
孫長紱知之欽此

同治四年閏五月二十六日內閣奉

上諭左宗棠等奏福建官軍勦賊大勝殲除要逆請將
出力陣亡各員分別獎卹等語道員康國器一軍自四

月二十九日永定劍灘勦匪獲勝後五月初二日復率各營行至塔下見該逆塔橋正在渡河卽領所部康熊飛等搶浮橋關鎖邦羅洪標等分擊山之上下湯彪等繼之該逆悉銳來迎官軍鎗礮齊施賊不少卻康熊飛等挑健勇數十名繞從河岸仰攻賊背羣賊驚潰官軍乘勢進攻搗斬偽天將會洋貴陸連幅偽朝將邵雲貴等並淹斃偽天將潘起亮偽朝將劉貴幅收降者萬餘人賊股全就殲除勦辦甚屬得手所有尤爲出力之福建延建邵道康國器著賞加布政使銜陣亡之邵司劉

振伍著交部照參將例議卹欽此

陳明調派水師沿海巡緝片

再福建水師提督臣吳全美奉

旨飭赴本任曾經臣

奏明就便速雇紅單拖舁船數十號來閩助剿比該提

臣於五月初八日到閩而漳州各郡縣業已次第克復

復經臣咨請速起新任除接篆日期另由該提臣恭疏

題報外伏查此項師船本因髮逆佔踞漳州希圖下海

爲沿海巡防而設現閩境雖幸一律肅清而閩浙洋面

島嶼紛歧時有賊匪出沒向來各營額設師船多已朽壞每遇出洋巡緝皆係臨時雇募廣艇現有此項紅單拖罾等船正可派員管帶往來梭巡以靖海疆而安商旅節經臣面商該提臣飭撥各船出洋巡緝旋准咨報派撥提督銜記名總兵浙江乍浦協副將現委署金門鎮總兵郭定猷總帶普字營紅單船十隻總兵銜儘先副將吳奇勳管帶慶字營紅單船五隻各幫上駛自福州海壇至浙江溫州甯波黃道關一帶洋面記名總兵李廷邦副將銜儘先參將李榮升總帶安字營拖罾船

十隻巡守金門以上至湄州海壇五虎等處總兵銜儘
先副將江開奇兵營遊擊梁正源總帶瀾字營拖罟船
十隻巡守金門以下至硤口銅山各要隘海口聯絡巡
防認真緝捕仍酌留儘先參將吳泰芬羅福安管帶慶
字營紅單船五隻駐泊廈門以爲控制並挑選熟識風
土民情之水師提標中營千總楊嵩生等分配普慶安
瀾四營以爲眼線均於五月二十五日一律起碇等情
前來除分飭閩浙沿海各舟師合力兜捕外理合附片
陳明伏乞

聖鑒謹

奏

同治四年閏五月初五日

軍機大臣奉

旨知道了著嚴飭派出各員認真巡緝毋得視為具文
日久生懈欽此

奏報攻毀匪巢餘逆淨盡摺

奏爲官軍攻毀雲霄廳岳坑匪巢搜剿餘逆淨盡恭摺
奏祈

聖鑒事竊照閩省沿海之區匪盜橫行由來已久而雲
霄廳所轄岳坑匪首朱起運朱庭燎朱庭獻等此次賊
陷漳州時導賊攻陷雲霄廳城迫廳城踞逆竄逸而該
鄉尙窩留僞天將陳仔及逆賊三百餘人生員朱得時
并受封僞職據雲霄廳同知宋文斐具稟前來臣宗棠
咨商暫駐雲霄署福建陸路提督郭松林記名提督楊

鼎勦就近前往剿辦茲准覆稱岳坑一寨地居萬山中
環村磬石爲牆排列大礮數十尊形如堅城環寨十餘
里皆朱姓小村內如溪坪大洞梁山等村更爲險惡山
前曲逕一道繚繞而上山後石壁峭立俯臨大洋夾山
大溪一道直達岳坑外濠山脚溪頭地名大洞樓乃生
嶺要路該逆憑險立寨計高三丈有奇牆垣亂石砌成
異常堅固又溪坪村亦有堅寨一座較之大洞樓尤爲
高大該逆自以罪大惡極知大軍必往剿捕先將合村
老少輜重糧米搬入梁山石洞中壘石斷路其匿迹該

鄉之僞天將陳仔率髮逆數百名及該鄉匪徒千餘人
踞之與山洞岳坑互相犄角其餘朱姓匪首糾集各村
悍黨六七千人堅踞岳坑並於石寨外加釘木城開掘
溝濠意圖死拒適提督黃中元總兵王萬釗周河清自
詔安各率行隊馳至五月十八夜郭松林楊鼎勳飭提
督黃中元總兵王萬釗周河清高占彪副將張遵道朱
興榮參將李占彪帶隊由船場嶺進提督易用剛總兵
曹仁美李長樂謝連升宋德鴻副將銜江蘇補用遊擊
楊玉書副將郭文武洪寶麟馬宗駿帶隊由荷步嶺進

十九日黎明行近岳坑將助逆朱姓各小村掃蕩殺斃
匪徒數百名旋即進攻岳坑并分隊圍攻大洞樓寨該
逆固匿不出官軍直抵濠邊副將黃璧首先踰濠而進
被鎗子貫穿胸膛殞命郭松林等憤甚麾軍急攻該逆
鎗礮連施子如驟雨傷亡士卒多名郭松林等將西洋
火箭射入霎時烟燄蔽空該逆倉皇分救遊擊楊玉書
卽乘勢躍上石垣各軍繼之該逆尙欲拚死拒戰官軍
大隊已衝殺而入當將岳坑匪巢攻毀逆眾殲斃無遺
間有逃逸者亦經民團截殺淨盡維時分攻大洞樓寨

官軍因牆壁堅峻地勢極險該逆又誓死堅守力攻半
日未破郭松林帶隊馳至繞視一週傳令各營圍定限
次日破之是夜五更直逼寨腳鑿開一穴填入火藥百
餘斤裝放引線囊土封固疾馳回陣踰時火藥轟發寨
牆震裂各軍一擁齊進生擒偽天將陳仔餘逆悉誅當
卽乘勝進薄溪坪寨其寨大可容二千餘人郭松林等
飭各營四面環攻該逆堅守如故郭松林等見該寨北
偏一面牆垣微缺遂令以炸礮轟擊歷一時之久摧塌
牆身七八尺各將士於缺口奮勇先登該逆亂拋磚石

抗拒官軍大隊熾附而上遂將溪坪寨攻破匪徒悉數
殲除二十一日復飭各營入山搜剿將僞天將陳仔及
匪首朱起運等正法梟示始收隊還此官軍追破雲霄
廳岳坑匪巢并將餘逆搜剿淨盡之實在情形也竊維
漳泉一帶負山濱海民間土樓石寨林立由明季備倭
固初備海寇而設浸久奸民踞爲巢穴或出洋行劫返
仍嘯聚其間或互相械鬪先將眷屬輜重安置寨中然
後列械肆鬪爲負隅之計官司不能詰禁則姑容之由
是匪膽愈張無所顧忌蓄之設險禦盜者今竟淪爲盜

數矣此次賊陷漳城土匪朱起運等竟敢勾引攻陷雲
霄廳城事平猶復窩匿逆目并於石寨外加造木城情
殊叵測幸郭松林楊鼎勳來聞時所帶攻堅利器如西
洋火箭及開花礮彈足以制之用能剋日奏功掃除匪
窟庶幾海濱頑民有所震懾由此不敢妄肆鴟張所有
最爲出力之副將銜江蘇補用遊擊楊玉書可否
賞加勇號以示鼓勵其力戰陣亡之常州案內擬保副
將黃壁擬保藍翎守備陳家晉應請
飭部從優議卹以慰忠魂現謹恭摺附驛馳

奏伏乞

皇上聖鑒訓示施行謹

奏同治四年閏五月初五日

軍機大臣奉

旨另有旨欽此

同治四年閏五月二十六日內閣奉

上諭左宗棠等奏官軍攻毀雲霄廳岳坑匪巢一摺
福建岳坑地方匪首朱起運等於賊陷漳州時導賊攻陷
雲霄廳城迨廳城克復該逆尙窩匿偽天將陳仔等負

嶠抗拒經提督郭松林等會同提督黃中元等於五月十九日併力進攻該逆猶拚死拒戰官軍大隊奮勇衝殺當將岳坑匪巢平毀並將大洞樓溪坪等寨次第攻破匪徒悉數殲除僞天將陳仔及匪首朱起運等均卽正法梟示剿辦尙爲得手在事尤爲出力之遊擊楊玉書著賞給壯勇巴圖魯名號力戰陣亡之擬保副將黃璧擬保守備陳家晉均著交部從優議卹以慰忠魂該部知道欽此

附陳下府民俗并辦土匪情形片

再閩省民俗獷悍以下府興泉永春一帶爲最上府延平所轄永安沙縣順昌等處李阿四逆黨尙多往往聚結多人時出剽掠延建邵三郡民多游惰其種山墾田造紙採茶多雇倩興泉永各處游民工作以故匪類雜出搶劫之案頻聞臣宗棠駐軍延平時曾搜捕著名匪犯鄭基卽下府基及聚眾劫搶擄人勒贖著名各犯五十餘名訊明正法並於建甯延平一帶添設師船往來巡緝以護商旅其興化泉州漳州永春各屬負山濱海民風獷悍尤甚向有烏白旗紅白旗小刀會千刀會等

名目拜會傳徒殺人行劫無惡不爲結黨橫行形同化
外官司往捕兵少則嘯聚拒捕兵多則匿入土樓山寨
開放鎗礮至於錢糧抗納不完遇事刻械私鬪猶其罪
之小焉者也此次髮逆攻陷漳州各屬土匪竄起或貪
利接濟或窩藏逆黨或導賊攻城或潛充賊諜捕獲正
法者不下數十起卽昨漳州克復後官軍向前追賊鍋
帳行糧運送落後者經過南靖平和各鄉猶被寨民攔
途劫搶并戕殺勇丁長夫數十人燬屍滅迹蓋因利其
微貲遂殘忍至此諸將領入閩之始臣以民俗愚悍驟

難化誨飭其勉爲含容惟嚴明約束勇夫人等勿有侵
異以導引善機而明各欲正己之義無如痼習已深勢
難冀其丕變若不趁此兵威亟圖整理恐髮逆之患雖
平而此方後患仍未艾也現同安上宅泔井等鄉土匪
經卽松林帶兵剿捕後續又報獲首犯陳背一名斬梟
在案其平和縣土匪經臬司王德榜飭派提督李運勝
副將林珠等拏獲大壩鄉首從要犯曾幫等十八名並
從逆生員朱以莊楊景燎二名均訊明分別正法臬示
其興化永春等處亦已飭委道員朱明亮前往查辦漳

州附城各處臣當督飭地方文武各員就近辦理擬先
將著名首要各犯立予嚴懲而後責各鄉紳董編造戶
冊散給門牌取具以後不准違犯互結聊爲治標之謀
至於移風易俗去暴勝殘則非擇廉靜明決之守令久
任而責其成功不可臣等不敢姑息養奸亦不忍殘民
以逞自當隨時盡心察酌辦理求紓

宸厯理合附片陳明伏乞

聖鑒訓示謹

奏
同治四年閏五月初五日

軍機大臣奉

旨著照所請認真次第辦理以期革面洗心民風丕變
欽此

清釐閩省欠餉停募兵缺摺

奏爲清釐閩省內地各營欠餉暫停募補兵額以節餉需恭摺具

奏仰祈

聖鑒事竊照閩省自軍興以後節次徵調兵勇防剿及協濟鄰省餉銀用款日增來源日竭而被匪蹂躪地方錢糧疊奉蠲免地丁又完不及半以致餉糈異常支絀是以內地各營按季應放餉銀近則給至同治二年夏餉止遠則給至咸豐十年夏餉止頻年積欠截至同治

三年底止已數至二百五十餘萬兩之多若不清釐補放何以整肅營規茲據福建布政司張銓慶詳請將各營欠餉截至同治四年夏季止由司照額全數發給司印票銀飭營領回一律清給造冊核銷如有應截曠缺等銀歸於以後餉內坐除清款所發之司票仍准兌收解司稅雜並捐輸兵餉各款造報以期流通行使所有本年秋季起由司仍循舊章按季清放銀票各半支給以免曠懸其失守地方未補兵額並節年調派各營防剿兵丁潰散逃亡及老弱吸食洋煙應行汰革者猶復

不少此時餉項無出合無仰懇

天恩俯准毋庸募補收伍統俟軍務平定應如何裁減
歸併再行

奏定辦理庶兵歸實用餉不虛糜除咨戶兵二部查照
外理合專摺具

奏伏乞

皇太后

皇上聖鑒施行謹

奏

同治四年閏五月初五日

軍機大臣奉

旨著照所請該部知道欽此